

Bringamosa

In The Spotlight

POTRETNAN DI HENDE MUHE NOTABEL

NOMBER : GLORIA CROES-BOEKHOUDT

EDUCACION : MASTER OF SOCIAL WORK, NA UNIVERSIDAD DI ALABAMA
BACHELOR OF SCIENCE IN SOCIAL WELFARE NA
UNIVERSIDAD DI ALABAMA, CHRISTIAN EDUCACION NA
JAMAICA BIBLE COLLEGE Y NA ARUBA SRA. CROES A BAI
JULIANA SCHOOL Y BEATRIX SCHOOL.

MOTIBO : UN HENDE MUHE CU AMBICION PA SIGI PADILANTI

PRONUNCIACION NOTABEL : MI FE DEN DIOS TA GRANDI NI CUANTO
CONTRATIEMPO TIN. MI NO TA DJIS LAGA TUR COS DEN
MAN DI DIOS, MI TA HASI MI PARTI PA LOGRA Y DIOSA
YUDA AMI Y MI FAMILIA DURANTE E 12 LUNANAN CU MI
TABATA AFO.

INTERES Y ACTIVIDAD PERSONAL : MIEMBRO DI IGLESIA ALIANSA
EVANGELICA, GUSTA BIAHA, LESA, PIANO Y CANA.

Nos di Bringamosa a aserca Sra. Croes-Boekhoudt pa un entrevista cu su persona tocante su trabao. Sra. Croes a lanta na Matividir y na un edad hopi hoben su familia a muda pa Piedra Plat na unda el a biba te cu su 9 aña. Despues di esey el a biba na Washington na unda su mayornan conhuntamente cu un Sra. Canades a lanta Centro Hubenil Washington. Sra Croes ta bin di un familia di ocho yiu di cual un a fayese na un edad hopi hoben. Sra Croes a bishita Beatrix y Juliana school na Playa. Despues el a bai studia na Jamaica pa cuater aña. Na aña 1976 el a bai Merca pa studia na Universidad di Alabama. Sra. Croes ta casa cu Anselmo Croes mihor conoci como Chemito Croes y nan tin dos yiu muhe, Nancy di 14 aña y Cindy di 13 aña. Nos di Bringamosa a puntra Sra. Croes di unda su ambicion a bin pa sigi studia na Merca ? G. C. : "Maske cu na Jamaica ta un Bible College mi a bai, mi tabata haña sicologia, lesnan di

antropologia, ect. y dor e lesnan aki mi a pensa pa bai studia sicologia of algo den e direccion ey. Mi ta corda cu tabata tin un doctor cu tabata duna les di sicologia. Durante un di su lesnan el a duna nos un test pa wak unda bo interes ta y mi a scoor halto riba tereno social, y a dicidi di bai studia den e direccion ey". B.M. : Sra. Croes pa kiko bo a escohe Merca pa studia? G. C. : "Mi a siña cuater aña caba den Ingles na Jamaica y mi ta gusta e sistema pa traha den simester". B.M. : Con bo experiencia tabata como estudiante na Merca? G. C. : "Mi mester a adapta na e school cu tabata mas grandi compara cu Jamaica. Tambe mi mester a adapta atrobe na un otro cultura y un clima diferente". Despues di a caba su estudio Sra. Croes a regresa Aruba y a bin traha pa gobierno den ramo social. Despues di casi 18 aña Sra. Croes a dicidi pa bai sigi un grado mas halto den estudio na Alabama. BM: Kiko tabata e motibo y

e motivacion pa bai studia nos di Bringamosa ta curioso pa sa? G. C. : "Semper mi tabata tin e deseo pa sigi studia pero mi a casa y haña yiu e la bai na segundo lugar. Na 1996 ora nos a bai vacacion cu familia na Alabama, mi a bai busca informacion na e Universidad. Minister Beke a yega di organisa un seminario cu workshop 'Genderbewustwording en Beeldvorming van de vrouw in de Media' anto mi a asisti na e workshop y a siña masha hopi mes, hende muhe por bai mas ariba y mi a realisa cu unda cu mi ta lo mi kier bai mas leu. Aserca di mi deseo pa sigi studia, y influencia di e workshop, mi a sinti tambe cu 'Dios', tabata guiami pa bai studia den e ramo ey. Den e Seccion di Dificultad di Bida y Familia, aña pasa no tabata tin un especialista pa traha cu adultonan. Esey a habri e posibilidad pa mi por a haña un studieopdracht pa prepara mi mes den e ramo di salud mental. Mirando e posibilidad mi a cuminsa



traha serio riba preparacionnan pa mi por bai studia. E preparacionnan a bai hopi liher. Pa por a drenta e programa avansa na e Universidad bo mester di un "Bachelor Degree" den e ramo social y e puntuacion mester ta halto pa por wordo selecta". Bringamosa a puntra Sra. Croes con tabata pa a bai bek Alabama y laga su familia atras? G. C. : "E tabata un desicion hopi dificil pa tuma y dor cu tur cos a bai asina lihe, mi familia no por a bai cumi. Dor cu mi a yega di studia na Alabama den pasado mi por a regla mi estadia cu facilidad. E estudio mes tabata hopi intensivo, pero den mi mente cu mi lo keda cla den 12 luna. Kiko e estudio ta ensena? Sra. Croes : " Mi a gradua den Master Degree Social Work, specialisa den Salud Mental. Esaki ta ensena traha cu personanan cu trauma, depresion, hende den

crisis. For di Juni mi ta hasiendo e trabao aki y constantemente mi ta keda lesa y studia . Mi ta traha cu adultonan como tambe cu parehanan. Tambe mi ta traha cu personanan cu den pasado a wordo maltrata, por ehempel fisicamente y cu awor ainda tin trauma cu ta stroba nan den nan bida actual. Locual mi ta kere tambe cu un di mi motivacionan ta cu mi ta stima hende, manera ta para den Bijbel, "Stima Dios cu tur bo curason, tur bo alma y cu tur bo ser, stima bo prohimo mescos cu bo mes". Mi ta trata tur hende como ser humano no importa ken nan ta of kiko nan ta". Ta un placer pa combersa cu Sra. Croes y nos di Bringamosa ta desea Sra. Croes hopi exito den su trabao.

